

LE

PETARD

D'ELOQVENCE

DE MAISTRE

Guillaume le Jeune.

*Voicy le plus braue Guillaume,
Qui ayt esté dans le Royaume,
Depuis Philippe de Valois:
Que s'il vous conte des nouuelles,
Ne pensez pas qu'elles soient telles
Comme est la foy des Rochelois.*



1

M. DC. XXI.

CASE


F

39

326

16219a

THE NEWBERRY
LIBRARY



LE PETARD

D'ELOQUENCE

DE MAISTRE

Guillaume le Jeune.



ELLES sont mortes les pauvres decedées, ces perduës, ces malheureuses villes rebelles de Bearn, de S. Iean d'Angely, Nerac, Clerac, & les autres qui craignans la touche pour estre de bas or, se sont soubsmises depuis peu, pieça, modernement, & n'a pas long iours, soubz les armes redoutables, & tousiours victorieuses de Monsieur mon amy. Elles n'ont plus de poux les miserables; plus d'haleine les impies; plus de mouuement les abominables. Mais ne voila pas bien des morts, encore qu'il fust question de la garderobbe des quinze-vingts de Paris, où il s'en trouueroit tousiours vne centaine au seruice de ceux qui en auront besoin. Sente qui voudra, pour moy ie suis morfondu. Ha! le dūr coup que

4

celuy de l'oreille. Ha ! que c'est vne belle chose qu'un decez Rebellionnaire, basty, construit, & erigé sur les fondemens, sacrileges, & apostatiques de Calvin, & ceux de Luther: que vous ont-il fait ? & donc ceux de Beze ?

Ie meure, si ce n'est la plus belle raillerie que ie vis iamais, que l'ordre des funerailles de ces pauvres decedées : car elles furent portées à la magnifique Consistoriale, par des gros mahustres de Crocheteurs, caparrassonnez en Buffles, de grands mantes de noir à la Reformée, suivies des Ministres & des Ministresses, des Anciens & des Anciennes, des Surueillans & des Surueillantes, des Freres & Frereselles en Christ, trois à trois, ou quatre à quatre, cōme vne compagnie de Reistres.

En bon ordre mes freres contre nostre coustume, disoit vn petit Sergeant de bande de Surueillans, courant deçà & delà par les rangs, avec vne halebarde gauchere de Chastelerault. Tenez bien vostre mine, Monsieur de Primeroze, vous n'aurez plus d'antecedant en vostre chere Ministrale de Bourdeaux: ne pleurez pas tant sur les cendres du pauvre Renaut, natif de la bonne ville d'Esquillon, qui gist d'heureuse memoire au tombeau.

Ha ! larmes de Crocodil. Ha ! beaux yeux d'Ecosse, qui tirés plus les Dames à vostre cordelle par vos ameçons, que par

vos leçons. Elles sont deffunctes pour leur vie, les paures decedées. A Dieu mes belles villes Rebelles, recommandations à la maistresse Proserpine.

Tout beau, c'est trop abuser de ces grandes Dames ; par Sainte Candide , en son vivant maistresse de Theodore de Beze , ie m'en plaindray à l'assemblée de la Rochelle. Ha ! celebre & sacro-saint Sinode de Guay , que tu sçais combien en vaut l'aune, de leurs Predicans , personnes toutes nées au mestier de la Rebellion, chastes si iamais Luther & Ecolampade le furent : tout feu quand au desir de la chair, tout glace quant au fait de la pieté & de la deuotion.

Il n'y a ordre , tous doivent passer par les piques du trespas , aussi bien les Pasteurs, que leurs villes detenues : aussi bien les rebelles que ceux qui font le coup à la paille : aussi bien Primerose que Renaut. A la bonne heure, puissent-ils aussi tost rendre l'ame, qu'il ne se parle plus de rebelle pretendu, ny de pretendue Reformation : ces noms me faschent , & feussent-ils à vau l'eau long-temps y a avec leurs autheurs. Nous ne verrions pas tant de barricades & tant de degasts de barriques par la campagne, comme nous faisons. Feu mon Pere, Monsieur Maistre Guillaume le vieux, s'en fust mieux porté de son vivant : lequel deuint stropiat de la ceruelle, depuis qu'il eust prins les armes à Castelnau, pour cette

malheureuse rebellion : que maudit soit-elle, & qui premier l'inuenta. Cela soit dict par paranthese. En Enfer donc mes belles, mes demantelées Villes, encore vn coup dans ces palus, & dans ces demeures Meotides ; vos premiers peres & fondateurs y sont des plus auancez, leurs compagnons, leurs camarades, ces boutefeux d'Allemagne, ces incendiaires d'Angleterre, ces Apostats de France.

Ah ! qu'il y fait chaud Monsieur le Ministre de Nort, qui preniez si bien en vostre vivant, le frais à la Rochelle ? Halte mes cheres Villes, vn petit mot de consultaton ne vous fera point de mal, mesmement de moy, qui suis l'enfant de ma mere, & fils d'un homme, qui en son temps, & en la saison, qu'il viuoit a esté Clerc, Diacre, Soldat, Gendarme, Marchand, Huissier & vn peu auant, qu'il ne fust, & encores apres qu'il eust fait cession de ses biens à ses créanciers, le fleau, & la toureboute du Chapitre de mon pays, & partant capable de vous donner vn bon aduis en amy. Je suis plus sage que vous, ne vous desplaise, pour m'estre mieux cõtenu que vous en l'obeyssance, tout mutilé que ie sois de l'entendement, & puis dire en verité, qu'il y a bien du hazard où vous allez.

Sçauiez vous depuis quand ? depuis cette malheureuse resolution que vous pristez de vous souleuer, & prendre les armes.

Auparauant on entroit en Enfer sans ceremonie : maintenant , il y faut plus de façon qu'en vn bonner de Prestre , il y a plus de Qui-uala , & de Qui-viue , qu'en temps de guerre : plus de sentinelles , & de corps de gardes qu'à Ostende , au temps qu'elle estoit assiegee par les Espagnols.

Elles n'en font rien , vne incredulité reformée les prent , mais elles n'eurent pas si tost faict trois pas en vn saut , que elles font rencontre de quelques gens à cheual , noirs comme des Ramonneurs de cheminee , qui battoient l'estrade par commandement de leur Capitaine , pour sçauoir si rien se bougeoit. Et mes Villes à vouloir monstrier les talons , comme elles auoient faict en France , de peur du Canon de Monsieur mon amy. Il n'estoit plus temps , car dès qu'elles furent apperceuës , vne douzaine de petits droles de Carabins , montez sur des cheuaux Barbes , pour mieux fuyr si le cas requeroit , brocherent des esperons , & les arresterent.

E me ni mon disoit le Prestre de Peirebuffiere , mot pour mes pauures Villes , la crainte leur auoit saisi le cœur , aussi bien qu'elle fist ces iours passez aux pauures Bernois , au rencontre fatal & malencontreux du Loup gris , qui fut manger leurs brebis en leurs pays ; cela fut cause qu'on leur en destacha quelques vnes sans recognoistre , & eust on fait pire sans vn de la

troupe qui les cogneut pour auoir beu en Suisse avec leurs Pasteurs , au Sinode de Gergeau, où il fut comme député des Eglises infernales. C'estoit vn bon Diable, plus praticien que gendarme, plus homme d'affaires que Soldat.

Ce danger franchy , elles arriuerent où Charon passe les ames des Reformez, apres qu'ils sont morts. Ce n'est pas pour aller en Paradis, ils n'en font pas les œuvres: ce n'est non plus en Purgatoire, ils luy ont fait le procez par tous les Sinodes, mesmes par celuy de la Rochelle, ville autant Reformee que i'en vis iamais, où Dieu est aussi bien recogneu que Monsieur mon Amy, pourueu qu'il n'y soit pas le plus fort.

C'est donc à l'autre, où il n'y fait si bon qu'à Paris, pour ceux qui ont de l'argent, en eussay-je mes pleines chausses: i'y paroistrois en posture, autrement braue que le soldat François, & Monsieur mon amy n'y feroit pas mal ses affaires, veu ce que i'ay encore à luy reueler, que ie ne dis pas à feu Monsieur son pere , quand ie le feus trouuer.

Mais sçauiez vous comme sont ces auenues? comme celles de la bonne ville de Captieux , en Latin , *Caput sylvarum* , où d'autres fois, feu Maistre Guillaume mon pere , a commandé pour la Rebellion, pays de sable, pays inculte, & aussi ingrat , que les terres que ie possède, entre les fleuves du Cyron,

du Cyron & de la Gouere : au milieu duquel, estoit vn lac comme celuy de Geneue, & sur iceluy, cette iolie ville d'Enfer, cent fois plus grande, que le grand Caire, voire que Quinsay en la Chine, où il y a douze mille ponts, & douze mille portes.

N'est elle pas iolie Margot,

N'est-elle pas iolie.

Si est vrayement, mais encore plus les habitans, lesquels prennent l'alarme d'une mousquetade tiree, & sont aussi-tost aux murailles, l'hallebarde à la main. Icy compagnons, disoient les vns : deça, disoient les autres, à la porte des Eumenides, à la porte des Gorgones, ils sont dedans, nous sommes vendus, la pouldre est mouillée, que ferons nous?

A ce que ie voy, ils'y fait aussi bien des fautes en Enfer, qu'à S. Iean d'Angely, & à la Rochelle : ils s'allarment sans occasion, & au premier coup de trompette. Bisognes, vous tremblez ? farfantes, & vous avez peur ? & pour quel pretexte ? pour des villes des rebelles, pour des lasches, pour des effeminées ? Hommes femmes, où est vostre cœur ? casserons, où sont vos espées ? pourquoy n'allez vous rompre la teste à ces arrogantes ?

Ils n'ont garde ; au contraire, pour témoignage de leur singuliere bien-vueillance

ce, cogneuës qu'elles furent, vestuës *in albis*, à la façon de ceux, qui baillèrent iadis la camifade aux liffres loffres de Reistres, que Dieu absolue, comme ils vouloient absoudre les pauvres Catholiques, si l'exploict d'Anneau ne leur eust empesché le passage de la riuere de Loyre. Vindrent au deuant d'elles, pour les receuoir & conduire en triomphe deuant la Majesté Plutonique, sçauoir, Messieurs Maistre Martin Luther & Gaspard, Menandre pour l'Alemagne, Martin Bucer & Pierre Martyr pour l'Angleterre, Iean Caluin & Theodore de Beze pour la France, Philippe de Nopes & Alexandre Alexis pour l'Ecosse, avec expresse commission de sadite Majesté, en datte du iour & an que Iean Hus, & Ierosme de Prague, furent bruslez au Concile de Constance pour la Pretendüe.

Ils marchoiënt grauement, ministrablement, & reformatiuement, reuestus de lōgs manteaux noirs à la Guimbarde, parfemez de Grenouilles au naturel ayans testes de femmes, tout ainsi qu'elles sont representées en l'Apocalypse. Et introduites que furent dans la ville mes Villes, parut & se glissa deuant elles vne belle Nimphe, habillée à la Laconique d'une gaze incarnate, attrayante, & luxurieuse à merueilles. Les vns disoient que c'estoit la Nonnain que Luther tira du Monastere de Torpat, ville de Lyuonie, afin d'honorer mieux sa nou-

uelle vocation. D'autres, la Florentine, Religieuse d'Islebe, à laquelle les persuasions de ce mesme Luther, firent jeter le froc aux horties. Quoy qu'il en soit : elle harangua courtement & succinctement, à la mode de son habit, & dit-on que le compositeur de cette harangue, fut Maistre Iean Sauariau, vivant Doyen des Conseillers Magistrats de la ville de Basas, homme disert & eloquent, si iamais ignorant le fut.

Ce n'est pas tout, car premier que d'estre admises au baïsemain de la Maïesté de Pluton, & de Dame Proserpine sa femme, on leur fist enfiler quelques ruës, esquelles estoient certains Portiques, & Arcs Triomphaux à l'antique, ornez, & enrichis des Armoiries de la Pretenduë, qui sont vn Christ empistolé, & des Merreaux d'or en champ de sable, portées par deux harpies sanglantes, avec couronnement de villes, & de Prouinces ruinées : de plus certains tableaux, & figures qui representoient l'entreprise d'Amboise, où l'on faisoit estat d'e-leuer comme vn corps saint, la personne du petit François, celle de la Roïne sa Mere, & des Princes du sang : la descente du Comte de Montgomery en Gascôigne, la prise d'Angoulesme, la coniuration de Meaux, celle aussi de Nantes, avec l'estœuf miparty de blanc & noir qu'on bailla aux coniurez, afin de se recognoistre, aux occurrences de leur trahison ; la tragedie de

Mussidan, & pour force à tout cela, la iournee de Saint Barthelemy, où vn fariné de Gratte-lard faisoit merueilles du pied de deuant.

Sur ces entrefaites, elles se rencontrent au deuant la maison du Prophete Renaut, virent escrit au frontispice d'icelle, d'une ancre encore assez fraische, pour son nouveau auancement en cette contree, *Renando Eguillonensi, Belgia Episcopo benemerito, Infernorum Respub. ob eius aduentum felicissimum.* Et en suite apperceurent celle de Maguil, Pasteur de mon village, non du tout si haut montee sur le tiers point, où estoit graué sur le Portail, dans vne pierre d'attente.

1. Maguil à sa mort eust voulu
2. De sa folle erreur se desdire;
3. Mais le pauvre il ne l'a pû,
4. Parce que de Dieu se retire,
5. N'a pas la grace quand il veut,
6. De pouuoir faire son salut.

Lecture faicte, suruint l'Admiral de Chastillon, encore tout passe & desfigurè du sang qu'il auoit perdu à Paris, suiuy du Sieur d'Andelot son frere, du Comte de Montgomery: Depiles, Mouy, la Nouë, Taligny, & autres Seigneurs des plus auancez au Martirologe Reformé: lesquels carressent mes villes extraordinairement, bras dessus bras dessous, pour les cognoistre

priement comme estans de leurs meilleurs amys : & les conduisirent en haut appareil chez Pluton, estroittement gardé par ses Regimens de Gardes, sçavoir le Regiment des Protestans d'Allemagne, celui des Puritains d'Angleterre, & des Sacramentaires de France, commandez par les trois Furies, Alecto, Tisiphone, & Megere fille de la nuit & d'Acheron. Et comme il fut question d'entrer, Calvin marcha deuant, & Beze derriere, puis les villes donnerent en queue, suivies seulement de dix ou douze des plus apparens. Surquoy il y pensa avoir quelque contestation, à raison de la preference : mais Monsieur Pluton survenant au bout de la sale, fist faire le hola, & aussi tost Proserpine (comme les femmes sont ordinairement impatientes, & ont un caquet plus prompt & plus proche des lésures que les hommes) partit de la maison, & preuenant son mary, courut les recevoir à bras ouverts.

Et vous voila mes bonnes : *quando de corpore* : comment vous portez vous ? que fait vostre convalescence ? depuis quand la venue ? estes vous pour longs iours en ville ? que dit-on en France ? tient on que le Roy par une estrange metamorphose, vous vueille convertir en villages ? est-il vray qu'il aye purgé la Guyenne, la Xaintonge, & le Poictou de vos rebellions ? qu'il n'aye plus à faire qu'à Montauban, &

à la Rochelle? qu'en dit son Assemblée, veut elle soutenir sa cause, iusques à sentence diffinitive? le Duc d'Espernon est il fort en leurs bonnes graces? fait-il bien sa charge de Commissaire, au regime & gouuernement de leurs effruicts? est il vray, que Pardaillan, Chasteau-neuf, & Duplessis Mornay ayent fait leur paix, au preiudice de la parole qu'ils auoyent donnee à vos Eglises? à quoy tient-il, que leurs intelligences ne soient si bonnes, qu'en la saison de Charles neuuiesme, & du petit François? le Roy, vous ayme il avec passion? son Conseil vous est il fort fauorable? l'entreprise de Caumont reussit elle suiuant le dessein de vos Pasteurs, & selon la necessité de vos affaires? est il veritable qu'on vous chauffe les esperons tout à la fois, par toutes les Prouinces du Royaume? dict-on que les Tolosains ayent présenté causes d'opposition, touchant le siege de Montauban? pensez vous qu'elle soit plus aduisee que Clerac, & S. Iean d'Angely.

Elles vouloient respondre à toutes ces interrogatoires, & à tout plein d'autres: mais suruint vn petit Pasteur, nouvellement venu de Nauarreins, par la voye de Moustache, à raison de la fidelité Pastorale, qu'il vouloit exercer contre le Chasteau, lequel les interrompant, leur demanda des nouuelles de Bearn, s'il estoit vray, que la Messe y eust esté absolument remise depuis

qu'il en estoit party ? si le Sieur de la Force
estoit aussi heureux en ses remuemens de
Guyenne, qu'en ses deportemens de Bearn ?
s'il s'y parloit point de fonder encore quel-
que Colleege de Iesuites ? si les villes de Ha-
lies, & Pontac estoit fort edifiées de la
courtoisie du Duc d'Elpernon ? s'il estoit
vray que ce Loup gris eust remis entiere-
ment tout le pays soubz l'obeyssance de sa
Maiesté ? Elles assurent que si ne le pou-
uant croire, pour estre l'incredulité, vn ap-
panage de la dignité Ministeriale, vne d'el-
les, pour le luy persuader, tira de la pochet-
te ces vers faicts à la loüange dudit Duc,
pour cet heureux euenement.

1. *Grand Duc qui venez de couper
La palme au Dieu Mars consacree:
Quelle plus belle destinee,
Pouuoit vos armes assister?*
2. *Ainsi que Cesar, vous avez
Veule derriere de Pompée:
Grand Duc, qui, sinon vostre espée,
Baille la fièvre aux Reformez?*
3. *Autre mieux, que vous ne pouuoit,
Vnir Bearn à cet Empire:
Mais quel Orphee, avec sa lyre,
Pourroit bien sonner cet exploit?*
4. *Vos faicts, à guise de Palmiers,
Ont porté bien haut vos victoires,
Et destruisant ces forces noires,
Vous ont construit mille Lauriers,*

5. *Force sans force, qu'en orgueil,
Force sans sa force premiere:
Force, qui perdit sa lumiere,
A l'aspect de vostre Soleil.*
6. *Soleil, dont le divin rayon
Chassa cette fortunee:
Ainsi iadis devant Persée,
Monstra Timanthe le talon.*
7. *Talon solstice de l'honneur,
Qui comme vn Soleil vous esclaire:
Talon de solstice contraire
A la foiblesse de son cœur.*
8. *Cœur, non : les Lieures n'en ont point,
Pieds, si pour courir de vitesse;
Que faut il qu'une bonne lesse,
Pour veoir les Lieures en pourpoint?*
9. *Ainsi vos Gersauts chasse-bois,
Duits à la chasse de la gloire,
N'ont-ils pas d'heureuse memoire
Chassé le Lieure des Bearnois?*

L'ayant creu par cet exēple, il pensa graisse fondre, de desplaisir, à raison du chaud brullant, & aduste, auquel ce climat est subiect, & plus que pas vn, qui se puisse trouuer sous la Zone torride. Et continuant ces interrogatoires, demanda quel homme c'estoit que le President Daffis, s'il estoit vray qu'il fut pourueu prouisionnellement de l'Office de premier President, vacquant si long-temps y a par le decez de Raignan? s'il y seroit si rude, & si bon iusticier

iusticier contre les Freres, comme en la Chambre de Nerac ? s'il estoit vray, que le President Pichon & ses collegues Catholiques eussent esté interdits en leurs charges par le Duc de Rohan ? si le Duc de Mayenne auoit suffisamment vengé cette iniure ? si le Marechal de Roquelaure acheuoit de la reparer par sa presence, aux despens des murailles, & des viures des pauvres Neracois ?

Là dessus le Presche sonna, il y fallut aller tous, sans en exception de personne, comme on faict és villes bien Refformées : & si ma memoire ne me trompe, on commença par ce petit distique de Marot.

Donne secours, Seigneur, il en est heur,
Car d'hommes droicts sommes tous desheur,
Entre les fils des Freres ne demeure
Vn qui ait foy tant sont diminuez.

Bon iusques à là, mais parmy ces frasons de Geneue, se glissa vne grande impatience de certaines Dames de France : lesquelles au lieu de prester l'oreille à la parole reformee de Christ, & les yeux sur certain canevas qu'elles auoient en main, sur lequel elles representoient au naturel les gestes pretendus & reformez de leurs maris, furent attaquer mes villes : l'vne luy parlant du pays d'où viennent les vaches de Bretagne, les autres de celuy d'où procé-

dent les anguilles de Melun & de Castinois, & toutes ensemble, se ietterent apres sur les places reformées de France, sur leurs divisions, sur leurs rebellions: leur demandent en quel estat estat estoient les Eglises, que leurs maris auoyent ruinées, celles d'Orleans, d'Angoulesme, de Fontenay, de Montauban, & mille autres, l'une plus belle que l'autre; quels Patenostres de Singe, on leur disoit en Gascogne, & en Languedoc: si l'on se souuenoit plus en Cour de l'entreprise d'Amboise, si les Peres en estoient plus en peine; s'ils estoient plus sages, & plus sapiens, qu'en la saison du petit François? Mais d'aurant que c'estoit assez chanté sans boire, le Presche finy, Proserpine commanda, qu'on portast la collation: & rafraischy, qu'on eust le hyppocondres, elle voulut qu'elles veissent les singularitez de la maison, prenant elle mesme la peine de les leur faire veoir.

On commença par les chambres, anti-chambres, garderobbes, cabinets, sales du commun, grand' sales à tenir le balet, & représenter les comedies, le tout tapissé de riches tapisseries de haute lisse, où aux vnes on lisoit comme dans des Pseaumes de la version de Beze, les premiers, seconds & derniers troubles de France, causez par la Pretendue; les passions de Henry huitiesme Roy d'Angleterre, tant contre l'autorité del'Eglise Romaine, que contre Tho-

mas Morus son Chancelier, & l'Euesque de Rochestre: auxquels ils firent trencher la teste, pour ne vouloir adherer à sa rebellion contre le saint Siege, & au dinorce qu'il vouloit faire, avec la Royne Catherine sa femme, pour espouser Anne de Boulan.

Es autres, on voyoit les reuoltes du Pays bas, contre leur Prince naturel: la barbare particuliere d'aucuns cõtre les Autels, & les Images des Saints, singulierement es villes de Tournay, Mons, Valencianes, & autres: là estoient aussi les remuemens des Escossois, puis la captiuité de leur derniere Royne, les factions du Milort Leuoy, & du Comte de Morthon, dont le premier alteré du sang de la Noblesse Catholique, fist pendre trente deux Gentils hommes en vn iour, & l'autre fist faire le mesme à l'Archeuesque de Saint André.

Après on yint aux Galleries, longues à merueilles, entrichies par le haut de Merreux d'or en champ de sinople, & percées par les costez, d'un rang egal de hautes croisées à la moderne, esloignées esgalement l'une de l'autre: où au lieu de tapisseries, estoient des tableaux de la grandeur de la place, representant les villes rebelles de France, comme elles estoient, premier, & auant que Monsieur mon Amy n'eust corrigé & amendé leur desobeissance, avec leurs bastions de l'Eu-gile, leurs rempars,

leurs esperons, leurs cazemates, leurs fossez, leurs tenailles, leurs demylunes, & autres moyens pour faire la loy au Prince, où il ne se voudroit pas soumettre à la leur, qui est celle de la Rebellion.

Leur fist veoir de plus les manufactures, où Mahomet second du nom, qui print Constantinople, faisoit des Tappis de Turquie; Selim, & Baiazet son pere, des tapisseries de Leuant; le Comte d'Essez, des draps d'Angleterre; le Marquis de Brandebourg, des treillis d'Alemagne: & les Comtes de Gauric, freres des frizons d'Escoffe, sans preiudice du thresor caché, qu'ils vouloient faire veoir à la Maiesté Escossoise, en la maison de Perth. Virent de plus, Messieurs de Rohan, & de Laual dernier decedez, qui y faisoient des toiles de Bretagne: le feu sieur de la Trimouille des quenouilles, & des fuseaux de Crotelle: Mouy, des sarges de Beauuois: Tarride, des razes de Montauban: & les Barons de Ros, & de la Harie, des cappes de Bearn, faconnées à diuers compartimens de couleur.

De là, elles s'en allerent promener chez Ierosme Hautin, lequel elles trouuerent imprimant pour la derniere edition, l'Apologie d'un pauvre Pet, eschappé par mesgarde & sans y penser des chausses de No-gueres de Sainte Bazeille; condamné à passer le guichet pour son irreuerence. Pareillement le vœu de Iacob, & la Trom-

pette de Syon du Prophete Primeroze , où ce bon homme nous veut faire acroire, que le bon Dieu estant aux nopces de Cana de Galilee , beut largement & copieusement avec ses Disciples, comme s'ils eussent esté Bretons Bretonnans , & s'en reuindrent joyeux & gaillards , après auoir trinqué: mais c'est vn Escossois.

*Et cela vous suffise,
Pour monstrier qu'il n'est pas plus amy de l'Eglise,
Que Viret, Chastelet, & la Roche-chandieu,
Ministres, qui viuans ne croyoient pas en Dieu.*


Et autrement gentils garçons , & bons interpretes de la Doctrine de Christ , de laquelle ils se disent les Pasteurs, aussi vray, qu'il est vray, que ie suis le Mareschal de Souuray , & Dom Christoffle de Mora, Seigneurs d'un calibre plus gros que ie ne suis pas , & que ie ne feray iamais.

Elles pensoient veoir d'autres merueilles, mais arriua sur l'heure vn changement bien estrange: car tous ces objects , qui sembloient estre solides & veritables , firent recognoistre que ce n'estoient qu'ombres & illusions, fantosmes & corps imaginaires disparoissans , & faisans voir à clair & à net, que les Rebelles & leurs adherans, ne sont pas tant à leur aise en ce pays là, qu'ils peussent dire, comme Saint Pierre à nostre Seigneur sur le Mont de

EA
Tabor, Domine, bonum est hic nos esse, & le
reste: car ils y sont plumez, tondus, fellez,
& frottez en fils de bonne maison, les vns
plus, les autres moins, selon qu'ils ont me-
rité, où de merité du patty, ne se pouuans
desdire de cette souffrance, & mauuais trait-
tement, ores qu'ils feussent si bien armez,
qu'ils furent iamais deuant Poitiers, lors
qu'ils y vouloient establir le bureau de leur
saincte Rebellion: & deussent ceux de Ber-
ne, y enuoyer vn pareil Cathalogue de
Suisses, qu'ils ont fait n'agueres a ceux de
Geneue, pour faire la nique au Sauoyard:
& si quelqu'un en doute, qu'il se transpor-
te au plustost sur les lieux, me soubmét-
tant à telle amende, que la Cour de ceans
aduifera, où les choses que ie dis ne con-
tiendront pas la verité.

DIXI

Donec maiora repenam.



SOVHAIT
DE M^e. GVILLAVME
LE IEVNE.

P*V*issent ces Demons de la Frâce,
(*Ainsi qu'ensans d'obeyssance*)
Bien tost se soubsmettre à la Loy:
Et tout ainsi que les fidelles,
Porter leurs vœux, & leurs chādelles
Aux pieds de l'Image du R O Y.
Puisseut leurs ames mutinées
Couvrir leurs armes refformées,
D'un plus legitime manteau:
Et croire, qu'on arreste en Greue
Les insolences de Geneue,
Avec le moulle du chappeau.

0.13

